

四庫全書

集部

欽定四庫全書

集部

後周文紀卷三

詳校官中書臣朱文翰

主事銜臣徐以坤覆勘

總校官進士臣楊懋珩

校對官原任典簿臣郭祚熾

謄錄監生臣劉紳

欽定四庫全書

後周文紀卷三

明 梅鼎祚 編

韋叟

字敬遠京兆杜陵人魏末拜雍州中從事去職微辟不應號逍遙公

戒子

建德中叟以年老預戒其子等悉遵行之

昔士安以薤蔕束體王孫以布囊繞尸二賢高達非庸  
才能繼吾死之日可歛舊衣勿更新造使棺足周尸牛  
車載柩墳高四尺壙深一丈其餘煩雜悉無用也朝晡  
奠食子事彌煩吾不能頓絕汝輩之情可朔望一奠而

已仍薦素蔬勿設牲牢親友欲以物弔祭者並不得為  
受吾常恐臨終恍惚故以此言預戒汝輩瞑目之日勿  
違吾志也

韋孝寬

名叔裕以字行夔弟歷大司空為徐州總管封鄖國公

上武帝陳平齊三策疏

建德之後武帝志在平齊孝寬疏陳三策武帝

遣使聘齊遂大舉克定卒如其策

第一策

臣在邊積年頗見閒隙不因際會難以成功是以往歲

出軍徒有勞費功績不立由失機會何者長淮之南舊  
為沃土陳氏以破亡餘燼猶能一舉平之齊人歷年赴  
救喪敗而反內離外叛計盡力窮傳不云乎讎有釁焉  
不可失也今大軍若出軹關方軌而進兼與陳氏共為  
犄角并令廣州義旅出自三鵠又募山南驍銳沿河而  
下復遣北山稽胡絕其并晉之路凡此諸軍仍令各募  
關河之外勁勇之士厚其爵賞使為前驅岳動川移雷  
駭電激百道俱進並趨虜庭必當望旗奔潰所向摧殄

一戎大定寔在此機

第二策

若國家更為後圖未即大舉宜與陳人分其兵勢三鷄  
以北萬春以南廣事屯田預為貯積募其驍悍立為群  
伍彼既東南有敵戎馬相持我出奇兵破其疆場彼若  
興師赴援我則堅壁清野待其去遠還復出師常以邊  
外之軍引其腹心之衆我無宿舂之費彼有奔命之勞  
一二年中必自離叛且齊氏昏暴政出多門鬻獄賣官

唯利是視荒淫酒色忌害忠良閭境熬然不勝其弊以此而觀覆亡可待然後乘間電掃事等摧枯

### 第三策

竊以大周土宇跨據關河蓄席卷之威持建瓴之勢太祖受天明命與物更新是以二紀之中大功克舉南清江漢西龕巴蜀塞表無虞河右底定唯彼趙魏獨為榛梗者正以有事三方未遑東略遂使漳滏遊魂更存餘啓昔句踐亡吳尚期十載武王取亂猶煩再舉今若更

存遵養且復相時臣謂宜還崇隣好申其盟約安人和衆通商惠工蓄銳養威觀釁而動斯則長策遠馭坐自兼并也

為行軍元帥鄖國公韋孝寬檄陳文

孝寬大象元年除徐

州刺史為行軍元帥徇地淮南攻壽陽拔之陳人退走江北悉平

偽陳私署公卿將校州鎮郡縣村屯邑落蓋聞五精上列耀鬼摠其威靈萬國下分皇王攝其區域至其創業垂統革命受終奄有神州光宅函夏莫不垂極襲聖積



德累仁播厚利于人民建大功于天地然後幽明贊叶  
兆庶歸往瑞之以龍圖鳳紀崇之以玉璽黃屋故能照  
臨九寓對越兩儀永保鴻名長為元首未有蠻貊夷落  
裔土荒隅崛起阡陌之中妄竊帝王之號斯則僭越之  
首縣于漢闕亡吳之主會于晉臣布在方冊可以龜鏡  
者也我太祖文武皇帝自天攸縱應運挺生屈道蕃條  
或躍伊始屬立運將改祿去王室三川已震九鼎將飛  
事切在泥禍深流蕪乃推誠仗義援手濡足迎衛乘輿

崇建旒社舉天維于將墜振地軸于已傾血氣食毛咸  
受其賜是則我有大造于區夏也重以闢土服遠包荆  
卷蜀功高于九合業重于三分愈執忠貞之操終以人  
臣之禮至哉大矣無得稱焉既而謳歌允屬金石變響  
神器大寶用集我有周我閔皇帝乃上膺靈命俯順樂  
推揖讓而登皇極垂衣而歸撫運世宗續統克隆洪緒  
武功文德騰茂飛英我高祖武皇帝以上聖隆下武以  
至道弘丕業其寂也象繫不能究其微其動也雷霆不

不能比其變偽齊竊據中原綿歷世紀帶之以巨海長  
淮鎮之以峻岱崇岳其地廣其民衆其俗富其兵強而  
帝遷明德人思睿后金鉞一麾廓然大定申弔伐之義  
荅億兆之心陟方之駕雖遠鼎湖之神未絕天元皇帝  
負四聖之休烈協千載之昌期懸金鏡振玉鼓宏天網  
廣地絡東窮海外西極河源邛笮夜郎之所冒頓呼韓  
之類莫不屈膝稽顙泛水梯山被華夏之仁風仰中國  
之聖道唯彼揚越獨為匪民葢芮魚鳥之郡晏安龜蛇

之穴故偽魁陳霸先火耕水耨之夫華門圭竇之子無  
行檢于鄉曲充部隸于藩侯施彼呼船之伎展其盜裘  
之用直蕭氏喪亂金陵擾攘爛羊啓邑拔卒為將遂得  
洗濯江漢奮迅泥滓王僧辯秉文經武挹義懷仁志在  
鷹揚誠深鶴立掃江表之巨寇復梁室之宗社提挈霸  
先成其羽翼而背恩忘德毀器折枝密相奄襲忍加屠  
害節士為之扼腕名臣所以流涕蕭方智世有江外實  
主梁祀霸先義則臣民任惟輔佐御下暴于戾虎輕上

踰于老牛包此禍心遽行篡弑遂令羣盜歟起宮闈窘  
逼梁棟之間顛死鋒鏑之下既甚南宮絕宋公之脰又  
過淖齒縮齊閔之筋自古逆子亂臣窮兇極悖未有如  
斯者昌實霸嗣舊加篡戮殘虐相襲報復循環陳頊獲  
自儲宮我之俘隸先朝深弘寬宥免其釁鼓置之夷邸  
淹歷歲時芻豢費上林之牧廩卹索長安之米其兄蒨  
發常山之念屢致誠請因矜孤首之感以禮遣送項稟  
性兇器不義不昵害及猶子僭其偽位朝廷遠撫長駕

含垢匿瑕遍省不虧輜軒繼路東夏克平威震淮海乘  
勝席卷咸請南轅高祖以得原失信義有不取懷遠字  
小理存久大而違盟背惠或從茲始搖蕩我邊陲侵軼  
我彭泗我是以有呂梁之役麾下裴忌程文秀之輩李  
緒蔣元舉之徒束手軍前不可勝計積甲等孤桐之岫  
溺卒斷浮磬之流頊長惡愈甚守迷不變據如掌之地  
延翹足之項猶怒臂當輒舉尾支山習黃旗之謬談志  
青蓋之妖說貫盈數盡今實其時加庚子應年金火入

斗天道人事宛若合符混一之期昭然可見寡人不武  
董茲戎律內稟帷幄出制天淵部勒諸將雷奔電擊大  
將軍龍門公拓拔王述領巴蜀之兵一十二萬出於白  
帝水陸俱下大將軍安昌公拓跋則領驍騎五萬濟於  
南岸循江東轉梁王舉一國之師盡舳舻之盛發自江  
陵首尾不絕行軍總管上柱國杞國公亮率步騎一十  
五萬掃蕩山林發自東關行軍總管上柱國郕國公士彥  
領人馬一十萬濟自泗口徑取廣陵幕府精銳二十萬

餘長驅淮水直指江左並同集石首大會金陵凡此諸  
軍皆從汧隴驍雄幽并勇俠揆犀拔象之夫斬蛟挈兕  
之士上谷漁陽之騎追風嘯雲荆門鄧塞之舟浮江沉  
漢象弭飾堂谿之材驚羽加淇園之竹旌旗麾電戈劒  
竟野鼓怒則江湖盪沸叱咤則山嶽簸跳以此攻城何  
城不陷以此衆戰誰能抗禦將恐郢門霄霜梧梓與櫟  
櫟同凋崑山火燎天球共珙玦俱盡故示以禍福冀相  
全濟陳項若識機知變輿櫬轅門當增安樂之封加有



歸命之禮偽公卿以下或中華之冠帶流寓江淮或東南之雋楚世載名位豈安危亂之邦事夷裔之主良由身居偽網迹淪寇地雖心存魏闕無由自拔故耳今正丈夫轉福之秋君子見機之日若能投誠進款展効立功富貴榮華義同俯拾如有不達機運敢拒王師軍有嚴科刑茲罔赦檄文所到咸共申省

振一作正祀一作紀顛死一作顛斃

不取一作不取轉  
福一作轉禍非

蕭撝

撝字智遐蘭陵人梁安成王秀子封永豐縣侯益州刺史戰敗歸魏入周歷少傅

請歸養表

撫為上州刺史入朝表屬置露門學高祖以  
撫與唐瑾元偉王褒等四人俱為文學博士  
撫以母老表請歸養私  
門高祖未許詔荅之

臣聞出忠入孝理深人紀昏定晨省事切天經伏惟陛  
下握鎮臨朝垂衣御宇孝治天下仁覃草木是以微臣  
冒陳至願臣母妾褚年過養禮乞解今職侍奉私庭伏  
願天慈特垂矜許臣披歛歸朝十有六載恩深海岳報  
淺涓埃肆師掌禮竟無稱職浙隈督察空妨能官方辭

違闕庭屏迹閭里低徊係慕戀悚兼深

武帝詔荅

開府梁之宗英今則任等三事所謂楚雖有材周實用之方藉謀猷匡朕不逮然進思盡忠退安侍養者義在公私兼濟豈容全欲徇己虧此至公乖所望也

蕭圓肅

字明恭梁武陵王紀子仕寧遠將軍降周歷洛州刺史進位大將軍終隋貝州刺史

少傅歲

周書建德三年圓肅授太子少傅作少傅歲玉海作太子歲據文義太子為是

惟王建國辨方正位左史記言右史記事莫不援立太

子為皇之貳是以易稱明兩禮云上嗣東序養德震方  
主器束髮就學宵旰更肄朝讀百篇乙夜乃寐愛日惜  
力寸陰無棄視膳再飯寢門三至小心翼翼大孝蒸蒸  
謀謨計慮問對疑丞安樂必敬無忘戰兢夫天道益謙  
人道惡盈漢嗣不絕乎馳道魏儲回環于鄴城前史攸  
載後世揚名三善既備萬國以貞姬周長乂寔賴元良  
嬴秦短祚誠由少陽雖卜年七百有德過歷而昌數世  
萬一無德不及而亡敬之敬之天惟顯思允副皇極永

固洪基觀德審諭授告職司

玉海東序作東庠記並作書更肆作夙肆讀作夕謀

謨作詢謀益作福于鄴作乎鄴賴作係誠作亦過歷而昌作彌昌萬一作一萬不及而亡作亟亡宮臣再拜敢

告職司

左史

二句在主器下

蕭大圜

字仁顯梁簡文帝子累封晉熙王江陵平歸西魏仕周滕王逌友終隋西河郡守

閒放之言

拂衣褰裳無吞舟之漏網挂冠懸節慮我志之未從儻  
獲展禽之免有美慈明之進如蒙北叟之放實勝濟南  
之徵其故何哉夫閭閻者有優游之美朝廷者有簪珮

之累蓋由來久矣留侯追踪于松子陶朱成術于辛文  
良有以焉況乎智不逸群行不高物而欲辛苦一生何  
其僻也豈如知足知止蕭然無累北山之北棄絕人間  
南山之南超踰世網面脩原而帶流水倚郊甸而枕平  
臯築蝸舍于叢林構環堵于幽薄近瞻煙霧遠睇風雲  
藉纖草以蔭長松結幽蘭而援芳桂仰翔禽于百仞俯  
泳鱗于千尋果園在後開窓以臨花卉蔬圃居前坐簷  
而看灌畦二頃以供饘粥十畝以給絲麻侍兒五三可

充絰織家僮數四足代耕耘沽酪牧羊協潘生之趣畜  
雞種黍應莊叟之言穫菽尋汜氏之書露葵徵尹君之  
錄烹羔豚而介春酒迎伏臘而候歲時披良書探至蹟  
歌纂纂唱烏烏可以娛神可以散慮有朋自遠揚摧古  
今田畯相過劇談稼穡斯亦足矣樂不可支永保性命  
何畏憂責豈若蹙足入絆申脰就羈遊帝王之門趨宰  
衡之勢不知飄塵之少選寧覺年祀之斯湏萬物營營  
靡存其意天道悶悶安可問哉嗟乎人生若浮雲朝露

寧俟長繩繫量寔不願之執燭夜遊驚其迅邁百年何  
幾擎蹠曲拳四時如流俛眉躡足出處無成語默奚當  
非直丘明所恥抑亦宣尼恥之

衛元嵩

益州成都人獻策  
後周賜爵蜀郡公

三易異同論

元嵩明陰陽歷數著  
易元包武帝尊禮之

夫尚質則人淳人淳則俗樸樸之失其弊也蠢蠢則變  
之以文尚文則人和人和則俗順順之失其弊也諂諂  
則變之以質質以變文文以變質亦猶寬以濟猛猛以



濟寬此聖人之用心也豈苟相反背而妄有述作焉

元包

注

柳霞

字子昇河東解人仕終霍州刺史

辭後梁主

答初於襄陽承制授霞吏部員外歷位侍中及答踐位江陵以襄陽

歸周霞乃辭答留鄉里答薨保定中始應徵為霍州刺史

陛下中興鼎運龍飛舊楚臣昔因幸會早奉名節理當  
以身許國期之始終自晉氏南遷臣宗族蓋寡從祖太  
尉世父儀同從父司空並以位望隆重遂家于金陵唯

留先臣獨守墳栢常戒臣等使不違此志今襄陽既入  
北朝臣若陪隨鑾蹕進則無益塵露退則有虧先旨伏  
願曲垂照鑒亮臣此心

樂運

字承業南陽涇陽人為京兆郡丞終廣州涇陽令

上宣帝論喪禮疏

高祖崩宣帝嗣位葬訖詔天下公除帝及六宮便議即吉

運時為京兆郡丞上疏不納

三年之喪自天子達于庶人先王制禮安可誣之禮天子七月而葬以俟天下畢至今葬期既促事訖便除文

軌之內奔赴未盡隣境遠聞使猶未至若以喪服受弔不可既吉更凶如以玄冠對使未知此出何禮進退無據愚臣竊所未安

侯北史作候

諫宣帝數赦書

帝德政不修數行赦宥運又上疏亦不納而昏暴滋甚

臣謹案周官曰國君之過市刑人赦此謂市者交利之所君子無故不遊觀焉若遊觀則施惠以悅之也尚書曰眚災肆赦此謂過誤為害罪雖大當緩赦之呂刑云五刑之疑有赦此謂赦疑從罰罰疑從免論語曰赦小

過舉賢才謹尋經典未有罪無輕重溥天大赦之文逮  
茲末葉不師古始無益于治未可則之故管仲曰有赦  
者奔馬之委轡不赦者座疸之礪石又曰惠者民之仇  
讎法者民之父母吳漢遺言猶云唯願無赦王符著論  
亦云赦者非明世之所宜豈可數施非常之惠肆姦宄  
之惡乎

陳宣帝八失書

運屢疏不納乃輿櫬詣朝堂陳  
帝八失帝大怒將戮之內史元

巖給帝曰運知書奏必死若  
殺之乃成其名也因而獲免

一

內史御正職在弼諧皆須參議共治天下大尊比來小  
大之事多獨斷之堯舜至聖尚資輔弼况大尊未為聖  
主而可專恣已心凡諸刑罰爵賞爰及軍國大事請參  
請宰輔與衆共之

二

內作色荒古人重誠大尊初臨四海德惠未洽先搜天  
下美女用實後宮又詔儀同以上女不許輒嫁貴賤同

怨聲溢朝野請姬媵未幸御者放還本族欲嫁之女勿更禁之

三

天子未明求衣日旰忘食猶恐萬機不理天下擁滯大尊比來一入後宮數日不出所須聞奏多附內豎傳言失實是非可懼事由宦者亡國之徵請准高祖居外聽政

四

變故易常乃為政之大忌嚴刑酷罰非致治之弘規若  
罰無定刑則天下皆懼政無常法則民無適從豈有削  
嚴刑之詔未及半祀便即追改更嚴前治政令不定乃  
至於是今宿衛之官有一人夜不直者罪至削除因逃  
亡者遂便籍沒此則大逆之罪與十杖同科雖為法愈  
嚴恐人情愈散一人心散尚或可止若天下皆散將如  
之何秦網密而國亡漢章疎而祚永請遵輕典並依大  
律則億兆之民手足有所措矣

追北史作遣  
更嚴作更散

五

高祖斲雕為朴本欲傳之萬世大尊朝夕趣庭親承聖旨豈有崩未踰年而遽窮奢麗成父之志義豈然乎請興造之制務從卑儉雕文刻鏤一切勿營

六

都下之民徭賦稍重必軍國之要不敢憚勞豈容朝夕徵求唯供魚龍爛熳士民從役祇為俳優角觝紛紛不已財力俱竭業業相顧無復聊生凡此無益之事請並



停罷

七

近見有詔上書字誤者即治其罪假忠讜之人欲陳時事尺有所短文字非工不密失身義無假手脫有舛謬便陷嚴科嬰徑尺之鱗其事非易下不諱之詔猶懼未來更加刑戮能無鉗口大尊縱不能採誹謗之言無宜杜獻書之路請停此詔則天下幸甚

八

昔桑穀生朝殷王因之獲福今玄象垂誠此亦興周之  
祥大尊雖減膳撤懸未盡消譴之理誠願諮諏善道修  
布德政解兆民之愠引萬方之罪則天變可除鼎業方  
固大尊不革茲八事臣見周廟不血食矣

李孝貞

字元操趙郡栢人人仕齊黃門侍郎入周終隋金州刺史在隋稱字

為宣帝祭比干文

孝貞北齊人齊平入周宣帝即位授吏部下大夫此文為

周宣帝作也藝文類聚作陳誤

自獨夫肆虐天下崩離觀竅剖心固守誠節忠踰白日

義槩秋天義皇已來一人而已

斛斯徵

字士亮廣牧富昌人仕周入隋除太子太傅周書作河南洛陽人

駁鄭譯新樂奏

譯宣帝時拜內史中大夫獻新樂十二月各一笙每笙用十六

管徵駁而奏之停譯所奏後為譯譜下獄遇赦入隋

禮云十二律轉相生聲五具在十六焉六律十二管還相為宮然詳一笙十六管總一百九十二管既無相生之理又無還宮之義臣恐鄭聲亂樂未合于古夫音樂之起本于人心天之應人有如影響為善者天報之以

福為惡者天譴之以殃故舜彈五絃之琴歌南風之詩而天下化紂為朝歌北里之音而社稷滅是知樂也者和情性移風俗動天地感鬼神禍福所基盛衰攸繫安可不慎哉案譯之所為不師古始若以月奏一笙則鐘鼓諸色各須一十有二雅樂之備已充廟庭今若益之於何陳列方須更闢階墀增修廊宇非急之務寧可勞人如謂笙管之外不須加造則樂之損益豈繫于笙進退無據竊謂不可

北史

達奚震

字猛畧武子代人也高祖時拜太宗伯震父武嘗為此職時論榮之隋開皇初薨

議調鍾律尺奏

宣帝時震及牛弘等議奏未及詳定

竊惟權衡度量經邦懋軌誠須詳求故實考校得衷謹尋今之鐵尺是太祖遣尚書故蘇綽所造當時檢勘用為前周之尺驗其長短與宋尺符同即以調鍾律并用均田度地今以上黨羊頭山泰依漢書律歷志度之若以大者稠累依數滿尺實於黃鍾之律須撼乃容若以中者累尺雖復小稀實於黃鍾之律不動而滿計此二

事之殊良由消息未善其於鐵尺終有一會且上黨之  
之黍有異他鄉其色至烏其形圓重用之為量定不徒然  
正以時有水旱之差地有肥瘠之異取黍大小未必得  
中按許慎解柎黍體本大異於常疑今之大者正是其  
中累百滿尺即是會古實籥之外纔剩十餘此恐圍徑  
或差造律未妙就如撼動取滿論理亦通今勘周漢古  
錢大小有合宋氏渾儀尺度無舛又依淮南累黍十二  
成寸明先王制法索隱鉤深以律計分義無差異漢書

食貨志云黃金方寸其重一斤今鑄金校驗鐵尺為近  
依文據理符會處多且平齊之始已用宣布今因而為  
定彌合時宜至于玉尺累黍以廣為長累既有剩實復  
不滿尋訪古今恐不可用其晉梁尺量過為短小以黍  
實管彌復不容據律調聲必致高急且八音克諧明王  
盛範同律度量哲后通規臣等詳校前經斟量時事謂  
用鐵尺于理為便

馬顯等

上景寅元歷表

武帝時甄鸞造天和歷靜帝大  
象元年太史上士馬顯等抗表

其術

施行

臣案九章五紀之旨三統四分之說咸以節宣發歛考  
詳晷緯布政授時以為皇極者也而乾維難測斗憲易  
差盈縮之期致舛咎徵之道斯應寧止虵或乘龍水能  
沴火因亦玉羊掩曜金鷄喪精王化關以盛衰有國由  
其隆替歷之時義於斯為重自炎漢已還迄於有魏運  
經四代事涉千年日御天官不乏於世命元班朔互有



沿改驗近則疊壁應辰經遠則聯珠失次義難循舊其在茲乎大周受圖膺錄牢籠萬古時夏乘殷斟酌前代歷變壬子元用甲寅高祖武皇帝索隱探賾盡性窮理以為此歷雖行未臻其妙爰降詔旨博訪時賢并敕太史上士馬顯等更事判定務得其宜然術藝之士各封異見凡所上歷合有八家精麤踳駁未能盡善去年冬孝宣皇帝乃詔臣等監考疎密更令同造謹案史曹舊簿及諸家法數棄短取長共定今術開元發統肇自景

寅至于兩曜虧食五星伏見叅校積時最為精密庶鐵  
炭輕重無失寒燠之宜灰箭飛浮不爽陰陽之度上元  
景寅至大象元年己亥積四萬二千五百五十四筭上日  
法五萬三千五百六十三亦名部會法章歲四百四十  
八斗分三千一百六十七部法一萬二千九百九十二  
章中為章會法日法五萬三千五百六十三厯餘二萬  
九千六百九十三會日百七十三會餘一萬六千六百  
一十九冬至日在斗十二度小周餘盈縮積其厯術別

推入部會分用陽率四百九十九陰率九每十二月下各有日月食轉分推步加減之乃為定蝕大小餘而求

加時之正

並隋書

王褒

字子淵瑯邪臨沂人儉曾孫規子梁吏部尚書左僕射江陵平入周歷太子少保小司空

終宜州

刺史

致梁處士周弘讓書

初褒在梁與梁處士周弘讓相善及江陵平褒歸周弘讓兄弘正自陳來聘高祖許通親知音問褒贈弘讓詩并致書弘讓復之周書文苑英華並載互異者注

嗣宗窮塗楊朱岐路征蓬長逝流水不歸舒慘殊方炎  
涼異節木皮春厚桂樹冬榮想攝衛惟宜動靜多豫賢  
兄入關敬承欸曲猶依杜陵之水尚保池陽之田鏟跡  
幽蹊銷聲窮谷何其愉樂幸甚幸甚弟昔因多疾亟覽  
九仙之方晚涉世途常懷五嶽之舉同夫關令物色異  
人譬彼客卿服膺高士上經說道屢經玄牝之談中藥  
養人每稟丹砂之說頃年事道盡容髮衰謝芸其黃矣  
零落無時還念生涯繁憂摠集視陰愒日猶趙孟之徂

年負杖行吟同劉琨之積慘河陽北臨空思鞏縣霸陵  
南望還見長安所冀書生之魂來依舊壤射聲之鬼無  
恨他鄉白雲在天長離別矣會見之期邈無日矣援筆  
攬紙龍鍾橫集

欽英華作閬池陽作東陂其周書作期北臨英華作北游鞏縣作鞏洛長離別

矣作邈無由矣邈無日矣作長無日矣

### 周弘讓復王褒書

甚矣悲哉此之為別也雲飛泥沉金鑠蘭滅玉音不嗣  
瑤華莫因家兄至自鎬京致書于窮谷故人之跡有如

對面開題申紙流臉沾膝江南燠熱橘柚冬青渭北  
寒楊榆晚葉土風氣候各集所安餐衛適時寢興多福  
甚善甚善與弟分袂西陝言反東區雖保周陵還依蔣  
徑三姜離析二仲不歸麋鹿為曹更多悲緒丹經在握  
貧病莫諧芝朮可求恒為採掇昔吾壯日及弟當年俱  
值邕熙竝歡衡泌南風雅操清商妙曲弦琴促坐無乏  
名晨玉瀝金華冀獲難老不虞一旦翻覆波瀾吾已惘  
陰弟非茂齒禽尚之契各在天涯永念生平難為胸臆

且當視陰數箭排愁破涕人生樂耳憂戚何為豈能遽

悲次房游魂不反遠

缺文

產骸柩無託但願愛玉體珍

金相保期願享黃髮猶冀蒼鴈鰓鯉時傳尺素清風明

月俱寄相思子淵子淵長為別矣搥管操觚聲淚俱咽

陵英華作陂恒為作聊因清商作清觴名晨作夕晨且  
當作正當金相作金箱蒼鴈周書作蒼鷹誤俱寄英華

作但寄搥管

周書作握管

### 謝賚馬啓

邊城無草來自東南塞外饒沙經從西北漢時樂府偏

愛權奇晉世桑門特憐神駿黃金作勒足度西河白玉  
為鐙方傳南國儻逢漢帝仍駕鼓車若值魏王應驚香  
氣

謝賚絹啓

似逐安車之徵如輕殿中之對臣善識山川應圖方丈

脫能臨水必不棄書

並藝文  
類聚

上新定鐘表

藝文

萬物生象始乎筭數天道運行基乎步術量有輕重平



以權衡音有清濁協乎律呂是以周發聽聲候春冬之  
生殺師曠吹律知晉楚之衰亡數始黃鍾琯終仲呂還  
宮變徵參天兩地三分損益累黍相乘四時發歛忽微  
斯測皇帝治歷明時推元受命八音七始之奏五聲六  
律之和斟酌繁簡分析節度推之以升斛正之以權衡  
稽之以古今覈之以經傳

上祥瑞表

明王孝治岳瀆所以効靈至人澤及風雲以之懸感是

以若霧非霧天道叶至德之符似煙非煙觸石表嘉祥  
之氣玄黃蕭索之輝丹紫輪囷之狀豈止唐帝沉璧氣  
合金方姬后望河形如車蓋

百僚請立皇太子表

臣聞洊雷居震春方應守器之禮明兩作離少陽纂重  
暉之業是以三善昭德載祀之祚克隆一人元良貞國  
之基永固至于軒轅得姓高陽才子上嗣佇賢前星虛  
位魯國公斌親居元子屬當儲貳具僚仰則列辟式瞻

臣等參議請立為皇太子事隆監撫教資審諭問安寢  
門視膳天幄

皇太子箴

有序

臣聞教化爰始詠歌不足政俗既移風雅斯變伏惟皇  
明御宇功鈞造物改文為質斲雕成素皇太子游雷居  
震明兩作離春夏干戈秋冬羽籥叔譽慙五耜之對師  
曠降四馬之恩竊以太史官箴虞書所誠永樹芳烈丞  
相所以垂文深覩安危太傅以之陳訓敢自斯義獻箴

云爾

天生蒸民司牧斯樹咸熙庶績式昭王度惠民垂統元  
良繼體麗止離暉惟機天啓令聞令望聞詩聞禮從曰  
撫軍守曰監國秋坊通夢春宮養德桓榮獻書荀攸觀  
則元子為士齒卿命秩朝服寢門迴車作室正陽君位  
喬枝父道臣子所崇忠孝為寶勿謂居尊禍福無門勿  
謂親賢王道無偏無為慮始無為事先損之又損而全  
之亦全無往不復無平不陂美疢甘言鮮不為累則哲

惟難知人未易居室為善分陰無棄亡保其存危安其  
位神聽不惑天妖斯忌文昌著于前星拒鬯由于守器  
庶僚司箴敢告闕寺

漏刻銘

有序

竊以混元開闢天迴地旋歷象運行暑來寒往二分同  
道烏靈正其昏夕兩至相遇表圭測其長短雖則晦朔先  
後失於公羊之說次舍盈縮惑於丘明之傳至乎出卯  
入酉黃道青綠季孟相推啓閉從序挈壺掌分數之令

卷三  
太史陳立成之法軍將以之懸井壺郎以之趨奏百王  
垂訓千祀餘烈者焉銘曰

玄儀西運逝水東流甘川浴日深壑藏舟測茲秘象是  
曰神謀正震治歷下武惟周忽微以測積空成數圭表  
弗差光陰斯赴箭水無絕靈虬長注徑寸日輪四分天  
度器遵昔典景移新刻荆山既鑄見吾且勒以福眉壽  
百王垂則

太傅燕文公于謹碑銘

古者六等官人師傳崇其匡輔一命作牧侯伯摠其專  
征南仲成薄伐之功吉甫作來歸之頌若乃仰叶宸曜  
上屬台階錫之以彝器明之以車服隆名盛業太傅燕  
國公其有焉西曄開其命緒東海傳其世祿父曾致平  
法之科廷尉稱無冤之頌駟馬方駕高門繼軌公稟山  
岳之上靈含風雲之秀氣雕良玉于廉劒鍊真金于鑒  
鎔于時王業締構國步權輿太祖地雖二分功猶再駕  
忠誠簡帝有志興王公運策帷帳參謀幕府封齊定文

成之計間楚資曲逆之奇仲華訪輿地之圖林叔參兵  
車之右魏恭帝元年為大司寇正刑糾慝國無害馬之  
倫翦暴詰姦民亡飲羊之俗三刺薦無簡之文兩造陳  
禁邪之憲大周受命寶厯攸歸表高惠之功臣紀山河  
之著命封燕公邑萬戶姬氏建國君奭始封昭王禮賢  
郭隗開館又授太傅本官如先保定五年賜金石樂一  
部公世為邊將少習兵書當敵制機臨戎應變增壘減  
竈之圖題樹繫桑之略軍中罷戰無廢雅歌壯士志驕



時觀投石及乎名高衛霍爵重韓彭錫邑增于鄭僑賜  
乘同于魏絳丹節比司隸之貴緹騎將金吾之寵座闕  
倡歌之娛堂無鐘鼓之奏辯功坐樹不伐征西之勲還  
第角巾無競龍驤之賞銘曰

惟岳降神膺期命世量苞川藪道弘兼濟昴宿協符佐  
旌冥契匪躬諒直武節橫厲函嶠重險鍾鼎淪覆潛龍  
勿用瞻烏在屋道贊上台功臣下瀆條教斯理彝倫載  
睦懋官惟德明試以功既移上將實董元戎傳呼甚寵

徽章載隆居高能降處貴思冲寶命惟新王猷允塞爵  
班異姓禮均同德林胡以南易州之北帝曰爾諧俾侯  
燕國駸駸過隙滔滔逝川明哲詎寶館舍長捐立言不  
沒遺愛在旃三河斥土駟馬開泉丹旒毀宗玄堂啓殯  
寵贈虛加鸞和空引晏子悼齊隨武懷晉謂天蓋高如  
何不愁

太保吳武公尉遲綱碑銘

昔者王室藩屏周德謂之宗親列國諸侯異姓稱為伯

舅元勲懿德姬崇齊楚之霸疏爵疇庸漢重韓吳之秩  
司勲載其弘烈典冊備其徽章山甫式列辟之功絕迹  
廟器莊叔匡成獻之難昭德彝鼎鴻名盛業公實兼焉  
公命世挺生應期間出嵩華峻極降惟岳之上靈霜露  
所均體中和之秀氣危松擢本且觀後彫之質貞桂挺  
生便體冬華之秀是故以辰昴膺慶風雲玄感者焉公  
柔順內凝英華外發斧藻仁義珪璋令範危勁之節貫  
四序而踰秀堅貞之操經百鍊而不銷加以達門射法

遠中戟支養由箭神通穿懸葉巧極將軍之伎精窮校尉之官及年踰艾服任隆台衮甲第當衢傳呼啓路不以寵貴驕人每以卑恭自牧易簣之言無忘寢瘝城郢之志終于瞑目銘曰

珠角應期山靈表德出忠入孝自家刑國人物冠冕彝章表則任屬屯警官聯極侍行部六條議班三吏逝水詎停光陰不借遽辭逆旅俄悲怛化旌舒夏練棺陳衛幕北郭人希西山景落三千不見九原誰作銘茲鼎鼎永傳萬霍

太子太保中都公步陸逞碑銘

公本居三吳郡三吳縣丞相遜後也宋武匡定鍾鼎底  
平涵洛公曾祖載實贊軍謀及返旆南轅以司武留守  
赫連作亂見拘夏州以江右名家為中山太守地既鮮  
虞途通靈壽呼沱易水仗武乘邊趙北燕南申威河外  
祖營州使君長於戎馬稱雄朔漠南中都督猶纘奕世  
之基西校國門無墜承家之業公識度深詳標尚閑遠  
處衆撓謙居簡行敬風鑒外明潛機內敏建章門戶張

華成立原陵松柏虞延盡記昔處文房又居內職或傳  
水華時遊甲邸魏祖軍謀還豫南陂之宴梁王師傳猶  
對宣室之談出內優隆通籍榮寵升降榮步便頌宮禁  
銘曰

淮海惟揚具區之藪水朝江漢星纏牛斗盛德遺風神  
明厥後龍章八命鸞旂四牡賓階昔遇風月相思卿門  
今別宿草何悲輪環不已零落無時永矣元伯長從此  
辭

上庸公陸騰勒功碑

在昔洞庭彭蠡三苗有遠竄之君太室陽城九州無同  
姓之國是知周衛設險所務非山川河岳作固所寶惟  
休德至於三峽蹇產九折崢嶸高峰尋雲深谷無景秦  
開漢閉雖阻荷戟之虞魏塞晉通終因東馬之利我大  
周開闢宇宙混同文軌御六氣于天樞頓八紘于地絡  
彭濮未恭邛笮不討外憑劒道之難內負銅梁之阨大  
將軍上庸公仗國威靈奉辭伐罪長戟萬隊巨艦千舳

板盾酋豪斯禰君長歷稔逋寇累代稽誅廓清江源蕩  
滌巴濮若夫荆門千里蜀置永安之宮巴水三迴吳阻  
夷陵之縣巫峽使君之灘淪波沓沒建平督郵之道棧  
徑威紆路阻蠻陬途橫夷落擅強專險輕法侮吏天子  
爰詔有司公奉命天討星言載塗指日邁邁冊授公大  
將軍信州刺史韓信召拜軍中致設壇之禮衛青出征  
臨河聞後距之令夫鍾鼎大禮之器昭德必書金石不  
朽之質庸勲斯樹某等乃建碑于某地敢作頌云



遐觀命氏眇求世祿龍圖紀河鴻漸于陸霸楚傳姓命吳  
啟族君子篤生降靈惟岳朝陽擢彩荆山曜璞巴庸自擅  
彭濮稱王南泊楚道西通夜郎內憑玉壘外阻銅梁介  
視荒服斗絕邊疆赫赫南仲堂堂方叔天子命我遐征  
越逐竇氏車騎去病冠軍封山刊石鐫銘剋勲遠隔年  
代懸感風雲盛德必祀千載斯文

故陝州刺史馮章碑

其先陶唐氏之苗裔堯少子生而手有馮字因以為氏

俾侯于魯義等房心之地余與之廣事符河汾之邑使  
君稟靈河嶽比德璵璠閨門和美譽聖開宗握文命氏  
濁水北流秦關東徙巖險襟帶山河枕倚陸離組甲從  
容青紫

四瀆祠碑銘

靈祠岳立貝闕雲浮寂寥詭怪髣髴神遊姬嬴分國河  
渭合流桃花春水靈草孤洲潼鄉河曲汾陰睢壤亂流  
不度龍門難上河魚送迎江妃來往水開通跡山臨高

掌智以藏往神以知來榮光離合雲氣徘徊水仙遺操  
津吏餘杯波息川后浪靖澹臺

溫湯碑

原夫二儀開闢雷風以之通響五材運行水火因而並  
用炎上作苦既麗純陽之德潤下作鹹且協凝陰之度  
至于遷陵熱溪沉魚涌浪炎洲燒地穴鼠含烟火井飛  
泉垂天遠扇焦源沸水衝流迸集甘川浴日跳波邁椒  
丘之野湯谷揚濤激水疾龍門之箭故以地伏流黃神

泉愈疾云云其銘曰

挺此溫谷驪岳之陰白磬上徹丹沙下沉華清駐老飛  
流瑩心谷神不死川德愈深

祭梁王僧辯母貞敬魏太夫人文

僧辯父神念  
天監初率衆

保合肥澤湖西因娶魏氏明哲婦人也及薨  
梁元帝以僧辯討誅侯景勲業隆重遣謁者  
至舟渚弔祭命尚書  
左僕射王褒為其文

維爾世基武子族懋陽元金相比映玉德齊溫既稱女  
則兼循婦言書圖鏡覽辭章討論教貽俎豆訓及平原

楚發將兵孟軻成德盡忠資敬自家刑國顯允其儀惟  
民之則反命師旅既修我戎補茲袞職奄有龜蒙毋由  
子貴宣爾斯崇嘉命允集寵章既隆居高能降處貴思  
冲慶資善始榮兼令終崦嵫既夕蒹葭早秋奔駟難返  
衝濤詎留背龍門而西顧過夏首而東浮越三宮之遐  
岳經三江之派流鬱鬱增嶺浮雲蔽虧滔滔江水逝者  
如斯銘旌故旄宇毀遺碑即虛舟而設奠想徂魂之有  
知嗚呼哀哉

象經序

天和四年武帝製象經集百僚講說有王褒及王裕何晏注又有象經發題義

其時庾信亦有象經賦

一曰天文以觀其象天日月星是也二曰地理以法其形地水火金木土是也三曰陰陽以順其本陽數為先本于天陰數為後本于地是也四曰四時以正其序東方之色青其餘三色例皆如之是也五曰筭數以通其變俯仰則為天地日月星變通則為水火金木土是也六曰律呂以宣其氣在子取未在午取丑是也七曰八

卦以定其位至震取兌至離取坎是也八曰忠孝以惇其教出則盡忠入則盡孝是也九曰君臣以事其禮不可以貴陵賤直而為曲不可以卑褻尊隱而無犯是也十曰文武以成其務武論七德文表四教是也十一曰禮儀以制其則居上不驕為下盡敬進退有度可法是也十二曰觀德以考其行定而後求義而後取時然後言樂然後笑是也或升進以報德義取遷善或黜退以貶過事在懲惡或以沉審為貴正其瞻視或以拘齊為

功明其糾察得失表于隆替在賤必申急敬彰于勸沮

處尊思屈片言崇于拱壁一德踰于華袞

按此序與庾賦並載藝文

其規制畧具揚用脩云據小說周武帝象經有日月星辰之象意者以兵機孤虛衝破寓于局間決非今象戲車馬之類楊公何不一引此而僅指小說且自天文以至八卦不但日月星辰也

服要記序

北堂書鈔

古之制禮其品有五吉禮祭祀是也凶禮喪葬是也賓禮朝享是也軍禮師旅是也嘉禮婚冠是也是五者民之大事舉動之所由也



論白帖

庸人御駑馬傷吻敝策而不進及駕齧膝驂乘且王良  
報軫韓哀附輿馳騁忽如景靡過都越國驅若歷塊追  
奔電逐遺風萬里一息人馬相得


幼訓

褒著幼訓以戒  
諸子其一章云

陶士行曰昔大禹不舛尺璧而重寸陰文士何不誦書  
武士何不馬射若乃玄冬脩夜朱明永日肅其居處崇  
其牆仞門無糝雜坐闕號呶以之求學則仲尼之門人

也以之為文則賈生之升堂也古者盤盂有銘几杖有誠進退循焉俯仰觀焉文王之詩曰靡不有初鮮克有終立身行道終始若一造次必於是君子之言歟儒家則尊卑等差吉凶降殺君南面而臣北面天地之義也鼎俎奇而籩豆偶陰陽之義也道家則墮支體黜聰明棄義絕仁離形去智釋氏之義見苦斷習證滅循道明因辨果偶凡成聖斯雖為教等差而義歸汲引吾始乎幼學及于知命既崇周孔之教兼循老釋之談江左以

來斯業不墜汝能脩之吾之志也



後周文紀卷三

欽定四庫全書

集部

後周文紀卷四

詳校官中書臣朱文翰

主事銜臣徐以坤覆勘

總校官進士臣楊懋珩

校對官原任典簿臣郭祚熾

膳錄監生臣劉能

欽定四庫全書

後周文紀卷四

明 梅鼎祚 編

庾信

字子山南陽新野人肩吾子仕梁散騎常侍入周歷司宗中大夫

賀平鄴都表

周武帝建德六年

臣某言臣聞太山梁甫以來卽有七十二代龍圖龜書  
之後又已三千餘年雖復制法樹司禮殊樂異至於文  
離武落剡木弦弧席卷天下之心包含八荒之志其揆  
一矣伏惟皇帝陛下握天樞秉地軸駕馭風雲驅馳龍

虎沉雄內斷不勞謀于力牧天策勇決無待問于容成  
是以威風所振烈火之遇鴻毛旗鼓所臨衝風之卷秋  
葉竊聞伊洛戎夷幽并僭偽抱關載籍已歸丞相之府  
銜玉繫綬並詣中軍之營百年逋誅遂窮巢窟三代敵  
怨俄然掃蕩昔周王鮪水之師尚勞再駕軒轅上谷之  
戰猶須九伐未有一朝指麾獨決神慮平定寓內光宅  
天下二十八宿止於吳越一星千二百國裁漏麟洲小  
水若夫咸康之年四方始定建武之伐諸侯並朝不得

同年而語矣雖復八風並唱未足頌其英聲六樂俱陳  
無以歌其神武坐釣臺而誓衆妣啓繼夏禹之功入商  
郊而問罪姬發成周文之志無改之道大孝也歟當今  
康臺已散離宮已遣兵藏武庫馬入華山立明堂之制  
奏太武之樂盛矣哉上天降休未之有也政須東南一  
尉立于比景之南西北一候置于交河之北然後命東  
后詔蒼冥衢壇琬碑銀繩瓊檢告厥成功差無慙德臣  
忝竊榮幸蒞政東藩不獲躬到闕庭預觀大慶不勝鳧



藻踊躍之至謹遣主簿陪臣曹敏奉表以聞

于文藝文類聚作天

馬矣作

賀新樂表

周武帝

臣等言臣聞天地順動則雷出為豫聖人成功則風行  
有節故六德在咸池之宮山谷可調八風入承雲之奏  
人神不雜我太祖文皇帝體國經野設官分職變魏作  
周移風正雅衣裳而朝萬國珪璧而會諸侯至如經綸  
圖籍校讐烟燼樂正無闕章秩宗無廢典豈但商頌十

篇得諸太師之室虞書五禮取于恭王之宮伏惟皇帝  
以下武嗣典中陽繼業運日月之明動淵泉之慮律歷  
著微無煩于太史陰陽晷度躬定於天官故得參考八  
音研精六代封晉魏為二王序殷周為三恪雖服朱干  
玉戚尚識典刑素韞黼裳猶因雄據未若山雲特起八  
卦成形鳳凰于飛九州觀德改金奏于八列合天元于  
六舞聲含擊石更入登歌調起初鍾還參玉管足以感  
天地而通神明康帝德而光玄象昔者齋居玄扈為曲

在於雲門師度盟津習舞歸于山立遂乃包括三名克  
諧一代作者之謂聖天之所啟乎豈惟路鼓靈鼗空桑  
孤竹廣矣大矣輪焉奐焉是知零陵孝廉空傳玉管始  
平太守虛稱銅尺臣等並預鈞天同觀張樂軒墀弘敞  
欄檻眺聽崇牙業業猛簏趨趨翠鳳揚旌靈鼉樹鼓杳  
冥雲霧蕩薄丘陵醴泉與甘露同飛赤鴈與斑麟俱下  
聘魯請觀理當見其盛德適齊忘味定是知其盡美昔  
淵魚聽曲尚得聳鱗樞馬聞絃猶能仰秣臣等誠媿知

音敢忘悅豫若使詳其音律是所邈然但能記其鏗鏘  
於茲為幸不勝慶悅之誠謹詣朝堂奉表以聞

為閭大將軍乞致仕表

臣某言臣聞禮云大夫七十致仕於朝傳家於子膳則  
貳珍衣稱時制臣自出身奉國四十餘年遭遇風雲從  
微至著太祖文皇帝扶危濟難奄有關河臣實無堪中  
涓從事自洛食風塵河梁旗鼓華陰有白馬之兵河曲  
有黃沙之陣臣雖用命不能奇策功薄賞厚因人成事

恩澤年表常以愧心仰逢周朝以揖讓登庸謳歌受命  
主貴臣遷頻煩榮寵三槐以鑄鼎象物知其神姦五等  
以桓珪飾瑞守其宮室臣以何德兼而有之况復水土  
之職王梁以應讖受徵兵戈之王韓信以登壇獨拜語  
其連類臣又何人當今四海未寧三方鼎峙陛下勞心  
之日羣公展効之秋而臣甲子既多耄年又及無忝賓  
客之事謬達諸侯之班尸祿素餐久紊彝典負乘致寇  
徒煩有司加以寒暑乖違節宣失序風木交侵菁華已

竭雖復廉頗強飯馬援據鞍求欲報恩何能為役榮啟  
期之樂適足自貽燭之武之言無能為也特乞解所居  
官言從初服事符骸骨之請非謀几杖之賜若臣北陵  
移病東臯歸老山河茅社一反司勳公侯珪璧還封典  
瑞則朝無冒位之人臣免妨賢之責虞氏養老敢希東  
序之榮周朝如荼豈望西郊之禮但瞻仰天威方違咫尺  
徘徊城闕私增悽戀不任知止之情

代人乞致仕表

臣邇言臣聞一葉將隕寧待于風露百川皆到自竭者潢  
汚臣輒感之以悲以咽臣某中謝臣仲春之末舊患漸加  
雙足頗蹇四支不利扶步有邯鄲之失勉視無離婁之明  
安可率此留務溷茲恒典陛下恩周曲成未忍捐棄微臣  
困至於亟轉不堪勝臣所以自咎自傷淚繼之血臣某中  
謝臣特承先緒進不因入陛下憫臣無用舉直而有慙自  
奉圖太極宣綍中書陛下收臣以一心任臣以獨掌九年  
異登宰輔八歲載踐宗伯出擁干旄入叅衡鏡或雲臺之

上微臣預疇咨之旨或日觀之下詔臣操刊勒之文美而  
暢之臣實尤忝明憲不敢以纖負立造竟微於滴助日月  
其渝水炭交集誠懷伏以前陪政事親荷德音謂臣等經  
侍軒墀子孫尚延保護臣荷螻蟻效戴邱山臣宜生亦盡  
命死且陳力竊不知終而不知止朝列三數與臣同儕臣  
未六十推臣則幼獨臣彌當頓頓病不俟年盈量窮涯滿  
而招損逾時每乖于勿樂永日猶繫于苞桑覽分必然貪  
榮所忌伏乞免臣見職退畢餘生察臣榮不可支矜臣分



不能強迺臣之幸也豈悟仁壽之聞有此一時承明之廬  
無緣再謁心神已弊晷刻增悲叨睿鑒則多士莫先違聖  
顏則小臣何遠惟冀三條啓道萬乘巡京悅西怨之羣黎  
逮東封之從者危鬼倘駐枯骨如存是臣之愜非臣所望  
臣又聞驅奔効駕先輟於羸駘翔集賀成近遺於鍛翮彼  
尚知慕而况臣哉聞未遑請臣之懇懇至於墮官臣合書  
罪無任戰慄懇結之至

齊王進白兔表

臣聞輿圖欲遠則玉虎晨鳴轍迹方開則銀麈入貢伏  
惟陛下明明在上翼翼居尊德動天關威移地軸是以  
風烟照燭毛羽禎祥史不絕書府無虛日臣受服元戎  
用綏邊鄙轅門所屆始次熊山前茅慮無乃獲白兔光  
鮮越雉色麗秦狐月德符徵金精表瑞呈祥輿頌効異  
披圖尊敬之迹既明應事之機斯兆臣之龔行實從陝  
略瑞以素質彌雄西氣庶重承廟筭方事申威揜代偃  
奔分韓裂趙不任鳧藻踊躍之情

齊王進蒼烏表

臣某言臣聞飛南陽之雉尚闡霸圖下建章之鵠猶調和氣況乃虞庭告瑞姬社呈祥咸高識哺之心實貴能知之性伏惟皇帝陛下德教百姓孝刑四海攝提從紀天下文明是以東海輸禽乍改黔質西山度羽或變蒼精臣去月三十日行到陝州獲大都督莫仁回樂列稱於州射堂內見一蒼烏林薄回翔循環不去駐乘木之精轉司風之翼即召儀同某甲等同時觀見斯實禮敬

所覃孝慈之感理宜歸瑞秘圖書祥帝冊用光至德取  
効升平無令赤鳳留止偏為瘞玉之歌玄鶴徘徊獨擅

銜珠之舞

鶴一作鵲  
孝刑一作刑于

### 齊王進赤雀表

臣某言臣聞南陽雉飛尚論秦霸建章鵲下猶明漢德  
當今天不愛寶地必呈祥自應長樂觀符文昌啟瑞伏  
惟皇帝欽明文思惟以劬勞成務厯象日月允釐百工  
海水無波天星不動去四月十三日獲隴右符府叅軍

李暉牒稱戶屬秦州清水郡伯陽縣文谷林在家庭獲  
一赤雀光同朱鳳色類丹烏降火飛精似入公車之府  
流金成製若上凌雲之臺謹按赤雀銜書止於鄴戶周  
之受命興乎此祥即事所觀同符合契實可圖形瑞譜  
書頌儒林事足成臺名堪紀號豈直雲中太守見赤心  
之奉主蓬萊童子知白環之報恩臣等預觀休徵情迫  
恒慶不任鳬藻之至

為晉陽公進玉律秤尺斗升表

臣某言臣聞三才既立君臣之道已陳六位時成禮樂之功斯正故以叶和日月測度陰陽悅豫兆人儀刑萬國者也伏惟皇帝應籙馭天披圖受命據太陽而懸像履文昌而建極白環表讓德之符玄珪告成功之瑞泰階既平升中可習必當水建千年山稱萬歲伏見敕旨刊正音律平章厯象奏黃鍾而歌大呂變孤竹而舞雲門莫不遠取疎通聲從安樂四分既明三微且定是以聞鐘於洛浦即辨聲乖聽鐸於邯鄲先知響韻二分二

至行於司厯之官九變九成被於中和之職足以動天地感鬼神被風俗平寒暑豈直吟嘯谿谷回翔鸞鳳而已哉是知零陵廟前徒尋舜管始平城下空論周尺臣聞上制其禮下習其儀君定其法臣行其事謹造玉律一具並玉秤尺斗升合等始得成功至于分粟累黍量絲數倫實以仰稟聖規叅詳神思所冀節移陰管無勞河內之灰氣動陽鍾不待金門之竹而琬琰事輕般倖慮淺不足展乎成均增輝度量賁器奉表以聞

進象經賦表

臣某言臣伏讀聖製象經并觀象戲私心踴躍不勝忤  
舞伏以性與天道本絕尋求直以懸諸日月遂獲瞻仰  
九州既奠近對河圖四轍中繩全觀玉策未飛玄鶴先  
聞金石之聲不上赤城獨見烟霞之氣置管而測光景  
愈高沉玉而觀淵泉益遠寢不自涯課虛為賦詞非寥  
亮學無雕刻遂敢陳述誠為厚顏况復日之遠近本非  
童子所問天之渾蓋豈是書生所談冒用奏聞伏增流



汗之至

賀傳位於皇太子表

臣某言伏見二月十九日詔傳位於皇太子昔者降居弱水登庸有優劣之殊來朝櫟陽繼體有君臣之異不得與夫天之兩日日之再中並曜聯輝重明雙照同年而語矣伏惟天元皇帝惟聖作聖惟親尊親降意於與能鳴謙於神器欲令百二相和先聞揖讓之風天下無為早識吾君之子是以運獨見之明行非常之事先天

不違後天而奉皇太子身負萬國道照四門夙膺再命  
之符寔允基天之命非闕復子明辟異於遷虞事夏既  
損既益尚或二天為離為火何妨兩日且平陽蒲坂賢  
臣則二十五人顓頊高辛才子則一十六族與此計事  
何遽無成饗乎鼓之軒乎舞之自當八風通慶雲聚五  
老同遊三星連曜豈直雙龍再賜九雉重飛而已哉皇  
帝藐然姑射正當乘雲馭龍問道崆峒豈復先秋木落  
臣生遇堯年時逢舜日覩惟新之慶實倍萬恒情

為杞公讓宗師表

臣某言伏見詔書以臣為使持節驃騎大將軍開府儀同三司宗師中大夫伏奉綸言心魂震聳臣聞堯分四岳是以望秩山川舜命九官是以光華日月必須儀刑以德明試以功乃可協和萬邦咸熙庶績臣幼無學植長闕裁成鴻都之門不能定其章句鷄鵲之塞無以名其碑碣憑天潢之派水附若木之分枝東岳則朝宿有名南宮則門閭有籍在臣庸劣久知滿盈武陽以功臣

之重特拜宗師東平以母弟之尊超登上將臣有何德  
能兼此榮臣早傾廷蔭曾未扶牆母氏慈訓哀矜勞苦  
甫及成人復垂捐棄几筵如在忍離鞠養之恩終天無  
報叩地難任欲草土丘陵終身塋域霜露申履時之感  
燕雀展迴翔之心不悟天澤沛然謬垂提拔當今玉燭  
調和既非金革之世璿璣齊政豈忘松楸之餘况復一  
枝蹉曲終危九層之臺一股涸蹄必傷千里之駕皇帝  
欽明文思光宅區宇禮格四方無容奪臣之志孝治天

下自當哀臣此情大宗為師更求同姓之國元戎叅乘  
別選能賢之臣伏願覽青蒲之奏曲允微誠詔鳳凰之  
池特收嚴召則天慈無濫私願獲從臣之容身便當有  
地不任荒悚戰懼之誠謹詣朝堂奉表以聞

功臣不死王事請門襲封表

臣聞以法施民必傳祀典以勞定國必有承家孫叔敖  
祭酹無聞有傷良相汝叔齊隋嗣絕沒實貶賢臣謹案  
大統十六年格先有封爵死於王事絕嗣者聽以支子

繼襲非死王事不許承封前牒五等功臣皆是勤勞王  
室身當患難扞禦災禍翼贊大猷一日遇疾身捐館舍  
不幸無肩享祀便絕于禮則不足于義則有傷未求上  
林之獵已削其侯不服襜褕之衣先除其國伏惟皇帝  
崇德旌庸興亡繼絕聞鼓輦而思將帥畫雲臺而念舊  
臣豈有功存社稷而無後可守事盡忠貞而無祠可祭  
周于藩屏為約事在世功漢以山河為誓義存長久臣  
聞存人之國大於救人之災立人之後重於封人之墓

竊以殷朝繼及無廢小宗周室興亡貴存身後紹高密者累葉豈專鄧禹之正胤嗣平陽者重世何必曹參之嫡孫愚謂生有其勞死非王事雖在支庶並聽承襲幸使伯有之魂不能為厲若教之鬼其無餒而幽顯對揚人神咫尺

為梁上黃侯世子與婦書

上黃侯蕭暕字通明  
始興王憺子初封安

陸侯歷晉  
陵太守

昔仙人導引尚刺三秋神女將梳猶期九日未有龍飛

劍匣鶴別琴臺莫不銜怨而心悲聞猿而下淚人非新  
市何處尋家別異邯鄲那應知路想鏡中看影當不含  
啼欄外將花居然俱笑分杯帳裏却扇牀前故是不思  
何時能憶當學海神逐潮風而來往勿如織女待填河  
而相見

藝文  
類聚

謝周明帝賜絲布等啓

明帝名毓文帝第二子  
初封寧都公在位四年

為宇文護所  
弑廟號世宗

世宗高祖皆雅好文學信特蒙恩禮至  
於趙滕諸王周旋欵至有如布衣之交



臣某啓奉勅垂賜雜色絲布綿絹等三十段銀錢二百  
文某比年以來殊有闕乏白社之內拂草看氷靈臺之  
中吹塵視甌懟妻狠妾既嗟且憎瘠子羸孫虛恭實怨  
王人忽降大賚先臨天帝賜年無踰此樂仙童贈藥未  
均斯喜張袖而舞玄鶴欲來撫節而歌行雲幾斷所謂  
舟楫無岸海若為之反風薺麥將枯山靈為之出雨况  
復全抽素蠶雪坂疑傾併落青鳬銀山或動是知青牛  
道士更延將盡之命白鹿真人能生已枯之骨雖復拔

山超海負德未勝垂露懸針書恩不盡蓬萊謝恩之雀  
白玉四環漢水報德之地明珠一寸某之觀此寧無媿  
心直以物受其生於天不謝謹啓

### 荅趙王啓

招初封趙國公建德三年進爵為王除雍州  
牧大軍東討招為後三軍總管又從高祖攻  
齊汾州信歷遷驃騎大將軍開府儀同三  
司司憲中大夫按書云渑池函谷又云遂  
摠憲司當是此  
時與趙王啓

某啓仰承張幕全韓連營上地渑池置陣解鄧禹之圍

函谷開關削王元之印蜂旗朝上刁斗夜鳴彌雄壯士  
之心足起橫行之志况復才人出娉還得賢夫塞外有  
夫人之城軍中有女子之氣都尉青旗即時春色將軍  
大樹已復花開雲氣浮壘流星汎枕細舞長歌橫簫直  
笛當乎此時青雲之上信不學無術本分泥沉忽逢天  
造搜揚仄陋今者遂摠憲司預聞刊鼎獻歲刑書既應  
懸法上春水鐸方須徇人但年髮已秋性靈久竭嘉石  
肺石無以測量舌端筆端惟知繁擁乖展一月遂涉兩

年傾首東瞻山河千里風塵未盡霜露沾衣仰願珍宜  
以為身寶謹啓

謝趙王示新詩啓

王好屬文學信

體詞多輕艷

某啓鄭叡至奉手教累紙并示新詩八體六文足驚毫  
翰四始六義實動性靈落落詞高飄飄意遠文異水而  
湧泉筆非秋而垂露藏之山嵒可使雲霧鬱起濟之江  
浦必當蛟龍繞船首夏清和聖躬怡豫琉璃管鵲顧

鸞迴婉轉綠沉猿驚鴈落下風傾首以日為年捷為舍  
人實有誠願碧雞主簿無由遂心寂寞荆扉疎蕪蘭徑  
驂駕來梁未期卜日遣騎到鄴希垂枉道

謝趙王賚絲布等啓

某啓鄭叡至蒙賜絲布綾等十段王褒至又蒙許賜錢  
等望外之恩實符大賚非常之錫乃溢生涯曳練且觀  
無勞白馬之望流泉欲委佇見青鳧之蜚楊池掘荷李  
園移樹既欣谷利彌思青林陳留下粟有愧深恩櫟陽

雨金翻慙曲施靈臺久客從此數炊黍谷長寒於今更  
暖從雲夢之田不踰此樂得豐城之劍未均斯喜謹啓

林一  
作木

謝趙王賚絲布啓

某啓奉教垂賚襍色絲布三十段去冬凝閉今春嚴勁  
雪似瓊田凌如鹽浦張超之壁未足障風袁安之門無  
人開雪覆烏毛而不暖然獸炭而逾寒遠降聖慈曲垂  
矜賑諭其蠶月殆罄桑車津實秉杼幾空織室遂令新

市數錢忽疑賑綵平陵月夜驚聞擣衣妾遇新鱗自然  
心伏妻聞裂帛方當含笑莊周車轍實有涸魚信陵鞭  
前元非窮鳥仰蒙經濟伏荷深慈謹啓

實一作費

又

某啓某息荀娘昨蒙恩引曲賜絲布等五段南冠獲宥  
既預禮延稚子勝衣還蒙拜謁闕尹津梁之織鄴地雙  
絲扶風彩文之機仙園獨璽青衿宜襲書生無廢學之  
詩春服既成童子得雩沂之舞况復栖鳥挾子同知桂

樹之恩澤雉將雛共喜行春之令根株一潤枝葉俱榮  
謹啓

謝趙王賚白羅袍袴啓

白藝文  
作卓誤

某啓垂賚白羅袍袴一具程據上表空論雉頭王恭入  
雪虛稱鶴氅未有懸機巧縹變躡奇文鳳不去而恒飛  
花雖寒而不落披千金之暫暖棄百結之長寒永無黃  
葛之嗟方見青綾之重對天山之積雪尚得開衿冒廣  
樂之長風猶當揮汗白龜報主終自無期黃雀謝恩竟



知何日

蝶一作綜

謝趙王賚犀帶等啓

某啓奉教垂賚犀裝帶錢十貫魏君寶帶特賜劉楨趙  
王國租偏資裴楷貫藏文馬如燒安息之銀帶插通犀  
似獵雲南之獸北郭騷之長貧是所甘愜南宮敬之載  
寶殊非念望花開四照惟見其榮鰲戴三山深知其重  
昔沈義將盡逢司命而還生士燮行埋值仙人而更活  
今日慈矜斯之謂矣馬前驅而導路或以識恩雖未曉

而開闢容能報主謹啓

三國志注童子謂杜畿司命使我名子畿固請童子為求代者

沈畿未詳  
埋集作終

謝趙王賚米啓

某啓奉教垂賚米十石丹烏銜穗既集西周黃雀隨車  
還蜚東市漬而為種不無霜雪之精取以論兵即有山  
川之勢某陋巷簞瓢櫛風沐雨剥榆皮于秋塞掘蟄燕  
于寒山仰費國租遂開塵甑非丹竈而流珠異荆臺而  
炊玉東方朔之捧米既息長飢西門豹之墾田方慙此

賚

捧藝文作俸炊一作  
碎並文苑英華

謝趙王賚雉啓

夏翟秋飛江顰春潤中牟縣之客遂得坐觀賈大夫之  
妻已應含笑仰費中厨來供下客山川道遠口腹知恩

藝文

類聚

謝趙王賚乾魚啓

某啓蒙賚乾魚十番醴水朝浮光疑朱鼈文鯨夜觸翼  
似青鸞况復洞庭鮮鮒溫湖美鯽波瀾成雨鱗甲防寒

某本吳人常想江湖之味及其飢也惟資藜藿之餘慈  
賚渥恩膏腴流竈不勞獅子之亭即勝雷池之長翻驚  
河伯獨不愛人足笑任公終年垂釣謹啓

謝趙王賚馬并繳啓

某啓奉教垂賚紫騮馬并銀釘乘具紫紬織一張上天  
降雨特垂深澤若木流光偏蒙私照迴茲翠蓋事重劉  
基之恩降此青驪榮深李忠之賜北鄙丹帷更須高捲  
西河竹馬即已郊迎在命之輕鴻毛浮於弱水知恩之

重黿背負於靈山况復驚鴻別水但見裴徊黃鶴去關  
惟知反顧棲戀之心事同於此

並文苑英華

謝滕王集序啓

滕王名道字爾固安文帝子位上柱國為隋文帝所害

滕王少好經

史善屬文

某啓伏覽制垂賜集序紫微懸映如傳闕里之書青鳥  
遙蜚似送層城之壁若夫甘泉宮裏玉樹一叢玄武闕  
前明珠六寸不得譬此光芒方斯照燭有節有度即是  
能平八風愈唱愈高殆欲去天三尺殿下雄才蓋代逸

氣橫雲濟北顏淵闕西孔子譬其毫翰則風雨爭蜚論  
其文采則魚龍百變蒲桃繞館新開碣石之宮脩竹夾  
池始作睢陽之苑瑠璃汎酒鸚鵡承杯鳳穴歌聲鸞林  
舞曲况復行雲逐雨迴雪隨風湖陽之尉既成為喜之  
因舂陵之侯便是銷憂之地其本乏才用無多述作加  
以建業陽九劣免儒硯江陵百六幾從士隴至如殘編  
落簡竝入塵埃赤軸青箱多從灰燼比年痾恙彌留光  
陰視息桑榆已逼蒲柳方衰不無秋氣之悲實有途窮

之恨是以精采瞽亂頗同宋玉言辭蹇喫更甚揚雄一吟一咏其可知矣好事者不求知音者不用非有班超之志遂以棄筆未見陸機之文久同燒硯至於凋零之後殘缺所餘又已雜用補袍隨時覆醬聖慈憐憫遂垂存錄始知逾揚過差君子失辭比擬從橫小人迷惑荆玉抵鵲正恐輕用重寶龍淵削玉豈不徒勞神慮匠石迴顧朽材變於彫梁孫陽一言奔蹄成於駿馬故知假人延譽重於連城借人羽毛榮于尺玉溟池九萬里無人

踰此澤之深華山五千仞終愧斯恩之重即日金門細  
管未動春灰石壁輕雷尚藏冬蟄伏願聖躬與時納豫  
南陽寶雉幸足觀瞻鄴縣菊泉差能延壽伏遲至鄴可  
期從梁有日同杞子之盟會必欲瞻仰風塵共薛侯而  
來朝謹當逢迎冠蓋魚腸尺素鳳足數行書此謝辭終  
知不盡謹啓

士一作事

謝滕王賚巾啓

某啓奉教垂賜庶子巾一枚解角新胎戴滕初孕落星



交映連珠疎點盤龍之刃既剪長命之縷仍縫翠羽懸  
推芙蓉高讓游斯隱士足笑鼓皮入彼春林方誇笋籜  
某蓬鬢鬆颿衰容耆朽三秋不沐實荷今恩十年一冠  
彌欣此賚謹啓

謝滕王賚馬啓

某啓奉教垂賚烏騮馬一匹柳谷未開翻逢紫鷺臨源  
猶遠忽見桃花流電爭光浮雲連影張敞畫眉之暇直  
走章臺王濟飲酒之歡長驅金埒謹啓

謝滕王賚豬啓

某啓奉教垂賚肥豕一腔白腹見珍度遼東之水赤欄  
為重對襄陽之城忽降全恩謹充炮烙孫弘牧于淄水  
惟以求錢卜式養于上林豈知其味謹啓

以上並文苑英華

荅移市教

昔張楷碩儒尚移弘農之市宜官妙篆猶致酒壚之客  
况復德摠郇周聲高梁楚希風慕義之士舉袂成帷卧  
轍反車之流摩肩相接遂使王充閱市之處遠出荒郊

石苞販鐵之所翻臨涯岍聖德謙虛未忘誼湫欲令吹簫舞鶴還反舊鄺賣卜屠羊請辭新闡而交貿之黨好留幽岐之衆難遣

移齊河陽執事文

周天和四年四月二十七使持節車騎大將軍儀同三司大都督陝西總管府移齊河陽執事自疆場卧鼓邊鄙收烽義讓之行未能朞月孔誠誨盜卽值苞藏是以板載之師須時而動自安封域非求拒防雖復風塵暫

接旗鼓無侵五將即迴雙嶠已靜始奉朝旨獲被移書  
令受叛城使迴軍實想彼邊司已奉處分既有此還輒  
須領納未知何日可遣戍兵指附行人遲能速報盟且  
不渝隣境相善顧瞻原野幸甚實多故移

獲被一作獲彼

### 同前

周天和四年十一月十日陝州總管長史梁昕移齊河  
陽執事自拭玉繼書通關去傳實謂上方銷劍山陽息  
馬過茲禦客或慢重局屬故司疆陰行善盜君一臣二

上穆下乖國家以邊鄙心搖須固備守大司馬齊國公  
天子介弟中軍元帥駕馭孫吳驅馳貔虎舉因農隙義  
異城郎師巡我境曾非反鄆縮載甫畢前旗已迴彼國  
兵馬不防殿後餘塵遂致相接建旌壘上未及五申安  
鄴城傍先驚七伏當時鋒刃或膏原野所獲彼將夏州  
刺史梁老首領今以相還戶鄉不遠無令久客馬驢甲  
兵具條相勒封人宜依領納宿無鬪志不獲交綏致此  
埃塵誰階其咎

移敵留使文

年月朔日某官告配某州郡前本欲發遣彼使但某入境以來國祥甫邇自秋迄冬未申款接且狼星表邦嚴霜已戒浮河亂濟長路苦寒時當獻歲惟新三元告慶珪贄盈庭華裔參軫式觀盛禮洽此嘉譴陽和既動澤漸萬邦便當遣使相隨永敦鄰睦故移

終南山義谷銘

并序

周保定二年歲次壬午七月己巳朔大冢宰晉國公命

鑿石闕之谷下南山之材維公匡濟彝倫弘敷庶績燮  
理餘暇披閱山經以為終南敦物日月虧蔽杕幹栝栢  
椅桐梓漆年代蘊積于何不有乃謀山澤之官兼引衡  
虞之匠東出藍田則控灞乘澹西連子午則據涇浮渭  
派別八溪流分九谷銅梁四柱石闕雙啓青綺春門溝  
渠交映綠槐秋市舟楫相通蓄之則為屯雲泄之則為  
行雨青牛文梓白鶴貞松運以寘宮崇斯雲屋千櫨抗  
殿龍首干雲萬頃踈苗蟬鳴再熟川后讓德山靈景從

豈如運石甘泉纔通櫟陽之殿穿渠穀水直繞金墉之  
城將事未勞為功實重國富人殷方傳千載因功立事  
敢勒山阿銘曰

寥廓上浮崢嶸下鎮直立千丈峯橫萬仞桂月危懸風  
泉虛韻乘輿嶺阪舉錨雲根八溪分注九谷通源北涵  
桐井南浮石門樸象大狀規繩百堵交葛九成徘徊千  
柱桂棟凌波栢梁乘雨疏川剪谷落實推柯事均刊木

功侔鑿河

關初學記作開引作列西作四關作闕寔作  
冥直立作壁立樸作模樸象大狀句作橫鴻



大河規作銀交作  
膠乘作垂剪作真

明月山銘

竹窓標嶽四面臨虛山危簷迴葉落窓疎看椽有笛對  
樹無風風生石洞雲出山根霜朝唳鶴秋夜鳴猿堤梁  
以堰野路疑村船橫埭下樹夾津門寧殊華蓋詎識桃  
源

行雨山銘

一作梁東宮  
行雨山銘

山名行雨地異陽臺佳人無數神女看來翠幔朝開新

粧旦起樹入牀頭花來鏡裏草綠衫同花紅面似開年  
寒盡正月遊春俱歸錦帔併脫紅綸天絲劇藕蝶粉生  
塵橫藤礙路弱柳低人誰言洛浦一箇河神

看來藝文類聚作羞

來頭作前綠作色  
生作多弱作垂

### 刀銘三首

風伯吹鑪雲師鍊冶鐵焰朝流金精夜下價重十城名  
高千馬

千金穎合百鍊鋒成光連斗氣燄動山精身文水動刃

古珠生

斗精遙降山靈下  
從水文千曲蛇  
鱗百重燕砥飲  
刃蜀水開鋒氣生  
分景環成曲龍

思舊銘

并序

歲在攝提星居監德梁故觀寧侯蕭永卒嗚呼哀哉人  
之滅也既非金石所移士之悲也豈有春秋之異高臺  
已傾稷下有聞琴之泣壯士一去燕南有擊筑之悲項  
羽之晨起帳中李陵之徘徊岐路韓王孫之質趙楚公

子之留秦無假窮秋于時悲矣况復魚飛武庫預有棄  
甲之徵鳥伏翟泉先見橫流之肇星紀吳亡庚辰楚滅  
紀侯大去邨子無歸原隰載馳輶轅長別甲裳失矣餘  
皇棄焉河傾酸棗杞梓與樗櫟俱流海淺蓬萊魚鼈與  
蛟龍共盡焚香複道詎歛遊魂載酒屬車寧消愁氣芝  
蘭蕭艾之秋形殊而共瘁羽毛鱗介之怨聲異而俱哀  
所謂天乎乃曰蒼蒼之氣所謂地乎其實搏搏之土怨  
之徒也何能感焉彫殘鍛翮無所假于風飈零落春枯

不足煩于霜露幕府昔開賢俊翹首為羈終歲門人謝  
焉至于東首告辭西陵長往山陽車馬望別郊門潁川  
賓客遙悲松路嵇叔夜之山庭尚多楊柳王子猷之舊  
徑唯餘竹林王孫葬地方為長樂之宮烈士埋魂即是  
將軍之墓昔嘗歡宴風月留連追憶平生宛然心目及  
乎垂翅秦川關河羈旅降乎悲谷之景實有憂生之情  
美酒酌焉猶思建鄴之水鳴琴在操終思華亭之鶴重  
為此別嗚呼甚哉麟亡星落月死珠傷瓶罄壘恥芝焚

蕙歎所望鐘沉德水聲出風雲劍沒豐城氣存牛斗潛  
然思舊乃作銘云

風雲上慘舟壑潛移駸駸霜露君子先危紀侯大去懷  
王不返玉樹長埋風流遂遠荀伯舊縣慶封餘邑萬里  
歸魂脩門詎入墳橫武庫山枕盧龍思歸道永返葬無  
從徒留送鴈空靡長松平陵之東無復梧桐松聲蕭瑟  
長起秋風疇昔隆貴提携語默託情嵇阮風雲相得有  
酒如澠終溫且克朝陽落鳳大野傷麟佳城鬱鬱流寓

于秦山陽相送唯餘故人孀機菱緯獨鳳孤鸞閨深夜  
靜風高月寒生平已矣懷舊何期匣中絃絕隣人笛悲

昔為幕府今成總帷

監德藝文類聚作鶉首減作戚肇作兆別作往傾作流與作共共作

並焚作燃共瘁作並瘁搏搏作博博至于作及乎摠作私庭作盧氣存作氣連伯舊作鄉故歸魂作傷魂墳橫作城連阮作琴獨鳳作獨鶴風高月寒作風月俱寒舊作故絕作斷

自古聖帝名賢讚二十七首

黃帝見廣成子

治身紫府問政青丘龍湖鼎沒丹竈珠流踈雲即雨落

木先秋至道須極長生可求

堯登壇受圖

藝文作  
登壇銘

登壇洛汭沉玉河湄丹圖馭馬綠甲乘龜榮光上幕休  
氣連帷雖存克讓於見文思

舜舞干戚

平風變律擊石來儀先齊七政更服三危朱干獨舞玉  
戚空麾南風一曲恭己無為

禹渡江



卷四  
三江初鑿九谷新成風飛鷁涌水起龍驚樂天知命無  
待憂生危舟遂靜亂檝還平

湯解祝網

連珠兩起合玉雙沉穀為祥樹桑成樂林三方落網一  
面驅禽德矣聖政仁乎用心

武丁迎傳說

虞田路斷辭澗泉飛躬勞版築有敝韋衣賢臣入夢天  
賜無違千巖之下遂得同歸

文王見呂尚

言歸養老垂釣西川岸止磻石溪唯小船風雲未感意

氣怡然有此相望于茲幾年

茲御覽  
作今

成王刺桐葉封虞

虞叔百里居河之汾帝刺桐葉天書掌文禮以成德樂  
以歌薰天子無戲唐其有君

師尚父授丹書

尚父一遇周王是親赤雀既下丹書已陳自論秉鉞長

別垂綸獨有礎石留名渭濱

周公戒伯禽

伯禽居魯鳴玉來朝周公政治為國風謠北山有梓南山有橋禮容雖備俯仰無驕

秦穆公飲盜駿馬

駿馬遇盜秦王不嗔先傾美酒翻畏人隣兵向國窮寇侵秦于時大盜還作功臣

延陵季子遇徐君

徐君有禮季子惟賢經過一遇如舊依然人非別後心  
許生前長松雖合寶劍猶懸

五月披裘負薪

披裘當夏俗外為心雖逢季子不拾遺金禽巢欲遠魚

沉唯深清聲滅跡何必山林

聲一作蹤

鉏麇見趙盾

趙盾將朝端衣整笏鉏麇受命衝冠怒髮惆悵賢臣顧  
瞻城闕利劍不抽青槐先絕

夫子見程生

程生夫子一遇相知薄言傾蓋桑陰遂移清陽共美賢  
聖同羈陳詩難別贈絹傷離

榮啓期三樂

榮期三樂唯人與年夫子相遇即以為賢性靈造化風  
雲自然雅琴雖古獨有鳴絃

孫叔敖逢蛇

叔敖朝出容悴還家母氏顧訪知埋怪蛇爾有陰德陽

報將加終為楚相卒受榮華

蔡澤就唐生相

蔡澤羈旅唐生決疑無勞神策不問靈龜富貴自取年  
壽須期雖云異相會待逢時

漢高祖置酒沛宮

遊子思舊來歸沛宮還迎故老更召歌童雖欣入沛方  
念移豐酒酣自舞先歌大風

漢武帝聚書

獻書路廣藏書柱開秦儒出谷漢簡吹灰芝泥印上玉

匣封來坐觀風俗不出蘭臺

柱御覽  
作府

張良遇黃石公

張良取履跪授無辭兵書一卷長者三期昔稱韓相今  
為漢師穀城餘石還歸舊祠

樊噲見項王

樊噲將軍漢王車右不憚鋒刃何辭卮酒霸上屯軍鴻  
門固守持謝范增唯留玉斗

袁盎諫文帝

千乘峻轍六轡危行跡迴松坂山叙柳城龍淵地狹華  
蓋風驚賢臣攬轡可謂忠貞

李陵蘇武別

李陵北去蘇武南旋歸驂欲動別馬將前河橋兩岍臨  
路悽然故人此別知應幾年

朱雲折檻

上書直諫有怙明君先求斬馬遂請魚文身摧欄檻義



烈風雲應從御史翻賴將軍

高鳳好書不知流麥

高鳳好學專心不迴流連經笥對翫書臺石門雲渡銅  
梁雨來麥流雖遠書卷猶開

王祥扣冰魚躍

王祥之母鮮鱗是求冰連釣浦凍塞寒流精誠有感無  
假沉鉤二老同膳雙魚共浮

鶴讚

并序

武成二年春三月雙白鶴飛集上林園大將鄭偉布弋  
設置並皆禽獲六翮已摧雙心俱怨相顧哀鳴孤雄先  
絕孀妻向影天子愍焉信奏事階墀立使為讚

九臯遙集三山迴歸華亭別唳洛浦仙飛不妨離繳先  
遭見羈籠摧月羽弋碎霜衣塞傳餘號關承舊名南遊  
湘水東入遼城雲飛欲舞露落先鳴六翮摧折九門嚴  
閉相顧哀鳴肝心斷絕松上長悲琴中永別



後周文紀卷四